

Siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

2022-mut aningaasanut inatsisissap isumaqatiginninniutigineqarnerani Ineqarnermut Attaveqaasersuutinullu Naalakkersuisoq inissiaqarnermut suliassa qarfirmi aningaasalersuisarnermut aqqissuussinerup nalilersuiffiginissaata sularinissaanik peqquneqarsimavoq. Nalilersuineq marlunnut avinneqarsimavoq, siullerlu november 2023-mi tunniunneqarsimalluni.

Nalilersuinerup immikkoortuani siullermi paasissutissat atortussallu kommuninit tunniunneqartut tunngavigalugit illuliortitsinerup aningaasalersuisarnermut aqqissuussinerup kommunit sularinnittarnerat atuisarnerallu pineqarpoq. Nalilersuinerup immikkoortuani siullermi inerniliunneqartut Namminersorlutik Oqartussat kommunillu akornanni artornartunut suliassanullu agguataarisarnerup tunngatillugu innersuussutissanut arlalinnut tunngaviliippat.

Nalilersuinerup immikkoortuata tulliani suliassa qarfirmut inatsisit inatsilerinikkut misissuiffiginissaannik kiisalu aqqissuussinerit allaffissornikkut aqutsinikkullu kommunit naalakkersuisoqarfiullu misilittagaannik tunngaveqarput. Kommunit aqqissuussinerup allaffissornikkut sularinissaanut akisussaasuupput, naalakkersuisoqarfillu inatsisip paasinissaanut akisussaasuulluni.

### **2. Siunnersuummi immikkoortut pingaarnerit**

#### 2.1 Najugaqarfissatut atuisarneq

Malittarisassat atuuttut malillugit inissiaq taarsigassarsititsinikkut tunniunneqartoq Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat naapertorlugu inuussutissarsiornerup atoqqusaanngilaq, matumani inuussutissarsiutit namminersortut mikinerusut eqqaassanngikkaanni. Inissiaq pisortanit taarsigassarsiat atorlugit inuussutissarsiutit atorneqarpat taarsigassarsiarineqartoq akiligassanngortinneqassaaq. Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat atuuttumi § 28 innersuussutigineqarpoq.

Inissiaq Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat naapertorlugu taarsigassarsiat atorlugit tunniunneqartoq taamaallaat piginnittumut taassumalu inoqutigiiwinut imaluunniit attartortumut taassumalu inoqutigiiwinut najugassatut aammalu aalajangersimasumik najugaqarfittut atorneqarsinnaanera

erseqqissaavigineqassasoq siunnersuutigineqarpoq. Inissiamik piginnittup imaluunniit attartortup taassumalu inoqutigiivinit inuussutissarsiutinik namminersortunik mikinerusunik ingerlatsisinnaassasut siunnersuutigineqarpoq. Allanguutissatut siunnersuummut nassuiaatini suut inuussutissarsiutitut namminersortutut mikinerusut ingerlatatut isigineqarnersut suullu inuussutissarsiutitut namminersortutut mikinerunngitsutut isigineqannginersut sukumiinerusumik nassuiaaffigineqarput.

### **3. Pisortanut aningaasaqarnikkut allaffissornikkullu kingunerisassat**

Siunnersuutip pisortanut aningaasartuutitigut allaffissornikkullu malunnartumik kinguneqarnissaa ilimagineqanngilaq.

### **4. Inuussutissarsiortunut aningaasaqarnikkut allaffissornikkullu kingunerisassat**

Inatsisini atuuttuni inissiamiit inuussutissarsiutinik mikisunik namminersorfiusunillu ingerlatsinissaq akuerisaavoq, inissiap annerusumik inigisatut aammalu aalajangersimasumik najugaqarfittut atorpeqartillugu. Ataatsimut isigissagaanni inissiami inuussutissarsiummut mikisunik namminersorfiusumut inuussutissarsiuteqarfik inissiap ilaatut taamaallaat annikitsuaraassaaq. Inuussutissarsiutinut mikinerusunut namminersorfiusunut assersuutitut taaneqarsinnaapput kukkuniuinermi allaffik mikinerusooq imaluunniit ussasaarinermi allaffik, sullitattut atassuteqarfigisat illumit anisarlutik, ulluunerani paaqqinnittoq namminersortoq imaluunniit isikkanik passussisoq.

Unnuiffillunilu ullaakkorsiortarfittut (bed and breakfast), gæstehjemmitut imaluunniit tikeraanut ineeqqat, akunnittarfiit, vandrehjemmit , airbnb aqqutigalugu sivikitsumik attartortittakkatut assigisaallu najugaqarfissatut aammalu aalajangersimasumik najugaqarfittut atorpeqartunut ilaanngillat.

Siunnersuutip malitsigisaanik, inuussutissarsiortut namminersortut mikinerusut, inissiami tapersiissutitalimmik inissialiornissamat taarsigassarsititsivigineqarsimasumi ingerlanneqartut eqqaassanngikkaanni, atorunnaartariaqassapput imaluunniit inuussutissarsiumminik ingerlatsivissaminik allamik nassaartariaqassalluni, imaluunniit tapersiissutitalimmik inissialiornissamat taarsigassarsiat pisortanut utertillugit akilertussanngussallugit.

### **5. Avatangiisinut, pinngortitamut inuillu peqqissusaannut kingunerisassat**

Siunnersuut avatangiisinut, pinngortitamut inuillu peqqissusaannut sunniuteqassanngitsoq nalilerneqarpoq.

### **6. Innuttaasunut sunniuteqaatissat**

Siunnersuut innuttaasunut aningaasatigut allaffissornikkullu sunniuteqassanngitsoq nalilerneqarpoq.

**7. Sunniuteqaatissat pingaarnertit allat**

Siunnersuut innuttaasunut malunnaatilinnik allanik sunniuteqarnavianngitsoq nalilerneqarpoq.

**8. Oqartussat kattuffiillu tusarniaaffiginerat**

Siunnersuut piffissami 16.08.2024 – 13.09.2024-mut Naalakkersuisut tusarniaanernut nittartagani tamanut tusarniutigineqarsimavoq, tamatuma saniatigut tusarniaaffigineqartartunut assigiinngitsunut toqqaannartumik nassiunneqarsimalluni, atuarneqarsinnaapput Ilanngussaq 2-mi:

Tusarniaanernut akissutini tiguneqartuni pingaarnertut immikkoortut Ilanngussaq 2-mi taaqqinneqarput oqaaseqarfigineqarlutillu.

**Siunnersuummi aalajangersakkanut ataasiakkaanut nassuiaatit***§ 1-imut*

Nr. 1-imut

Erseqqissarneqarpoq inissiat tapersiissutitalimmik inissialiornissamut taarsigassarsititsivigineqartut taarsigassarsisumit taasumalu inoqutigiiivinit imaluunniit attartortumit taasumalu inoqutigiiivinit najugaqarfissatut aamma aalajangersimasumik najugaqarfittut atornagu siunertanut allanut atorneqarsinnaanngitsut.

§ 28, imm. 1, nr. 5-imut siunnersuummi erseqqissarneqarpoq, inissiat tapersiissutitalimmik inissialiornissamut taarsigassarsititsivigineqarsimasut, taamaallaat najugaqarfissatut aammalu piginnittup taasumalu inoqutaasa aamma attartortup taasumalu inoqutaasa aalajangersimasumik najugaqarfissaattut, taamaallaat atorneqarsinnaasut. Tamatuma kingunerisaanik piginnittup imaluunniit attartortup inissiaq taamaallaat najugaqarfissatut atorsinnaavaat, peqatigisaanillu inissiami aalajangersimasumik najugaqarlutik inuit nalunaarsorsimaffiani nalunaarsorsimasussaallutik. Inissiap ilaata attartortumut najugaqarfissatut aammalu attartortup aalajangersimasumik najugaqarfissaatut attartortinneqarnera, siunnersuutip killissaasa iluanni pisinnaavoq.

Assersuutigalugu inissiamit tapersiissutitalimmik inissialiornissamut taarsigassarsititsivigineqarsimasumit inuussutissarsiummik ingerlatsisoqarsinnaanngilaq. Inuussutissarsiummi inissiap suliffeqarfittut inuussutissarsiutitut atorneqarnera pineqarpoq, matumani suliffeqarfik sinneqartoorfiulluni imaluunniit amigartoorfiulluni ingerlanneqarnera apeqqutaanani. Taamaammat inissiaq tamakkerlugu ilaannaaluunniit atorlugu inuussutissarsiummik ingerlatsisoqartillugu taarsigassarsiaritineqartut akilerneqartussanngorlutik akiligassanngussapput.

Inissiami najugallip taasumalu inoqutigiivisa inissiamit inuussutissarsiummik mikinerusumik ingerlatsisinnaanerat matumani mininneqarpoq. Ilumut inissiaq pingaarnertut najugassiatut atorneqarnera Naalakkarsuisut naliliiffigissavaat. Nalinginnaasumik inissiami inuussutissarsiummut mikisumik namminersorfiusumut inuussutissarsiuteqarfik inissiap ilaatut taamaallaat annikitsuaraassaaq. Inuussutissarsiutinut mikinerusunut namminersorfiusunut assersuutitut taaneqarsinnaapput kukkuneruineri allaffik mikinerusoq imaluunniit ussasaarineri allaffik, tassani sullitanut attaveqarneq pingaarnertigut illumiit anilluni ingerlanneqartarluni, ulluunerani paaqqinnittoq namminersortoq imaluunniit isikkanik passussisarfik. Inuussutissarsiut namminersorfiusoq mikinerusoq inissiami najugalimmiit taasumalu inoqutigiivinit ingerlanneqartussaammat sulisusanik sulinerminni inissiamiit ingerlatsisinnaasunik sulisoqaaqusaanaviannngilaq.

Inissiaq piginnittup taassumalu inoqutigiivisa imaluunniit attartortup taassumalu inoqutigiivisa aalajangersimasumik najugaqarfittut atornagu siunertanut allanut atorneqarnera, assersuutigalugu unnuiffiullunilu ullaakkorsiortarfittut (bed and breakfast), airbnb aqputigalugu sivikitsumik attartortittakkatut, gæstehjemmitut, tikeraartunut ineeqqatut, vandrehjemmitut, akunnittarfittut assigisaannulluunniit, najugaqarfissatut aamma piginnittup taassumalu inoqutaasa imaluunniit attartortup taassumalu inoqutaasa aalajangersimasumik najugaqarfiattut atorneqarneratut isigineqassanngilaq. Assinganik assersuutigalugu ineeqqamik suliffeqarfiup sulisut, tikeraartut imaluunniit angalasut inissaqartinnissaannut attartortinneqarnera, najugaqarfissatut aamma attartortup taassumalu inoqutaasa aalajangersimasumik najugaqarfiattut isigineqanngilaq. Taamatut atuineq aammattaaq inuussutissarsiutigalugu suliffeqarfittut ingerlatsinertut isikkoqarpoq, inuussutissarsiutitullu mikinerusutut isigineqarnani.

### § 2-mut

#### Imm. 1-imut

Inatsisissatut siunnersuut ulloq 1. januar 2025 atuutilissasoq siunnersuutigineqarpoq. Tapersiissutitalimmik inissialiortiternermut inissiat inuussutissarsiutit atorneqartunik siornatigut suliaqartoqarsimaneranik Naalakkersuisut ilisimasaqanngillat. Taamaammat nalilerneqarpoq ikaarsaarnermut aaqqiinissamik pisariaqartitsisoqanngitsoq.

#### Imm. 2-mut

Allannguutit Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit inissianut tapiiffigineqartarnermut taarsigassarsisarneq pillugu siusinnerusukkut inatsisaasimasut naapertorlugit taarsigassarsianut pioreersunut tunniunneqartunut atorneqartussaapput.

Allannguummi ilaatinneqarput taarsigassarsiat ilanngunneqartut tapersiissutigineqarsimasut

- Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat nr. 40, 28. novembari 2019-imeersoq,
- Inissialiornermut tapersiissuteqartarneq pillugu Inatsisartut peqqussutaat nr. 1, 9. aprili 1992-imeersoq kingusinnerusukkut allannguutai ilanngullugit,
- Kalaallit Nunaanni inissialiornermut tapersiissuteqartarneq pillugu Inatsisartut peqqussutaat nr. 10, 22. Decembari 1986-imeersoq.

#### Imm. 3-mut.

Allannguutit Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit inissianut tapiiffigineqartarnermut taarsigassarsisarneq pillugu siusinnerusukkut inatsisaasimasut naapertorlugit neriorsuutininut pioreersunut tunniunneqartunut atorneqartussaapput.

Allannguummi ilaatinneqarput taarsigassarsiat ilanngunneqartut tapersiissutigineqarsimasut

- Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat nr. 40, 28. novembari 2019-imeersoq,
- Inissialiornermut tapersiissuteqartarneq pillugu Inatsisartut peqqussutaat nr. 1, 9. aprili 1992-imeersoq kingusinnerusukkut allannguutai ilanngullugit,
- Kalaallit Nunaanni inissialiornermut tapersiissuteqartarneq pillugu Inatsisartut peqqussutaat nr. 10, 22. Decembari 1986-imeersoq.

Ulluinnarni sulinermi taarsigassarsinissamut neriorsuutit nalunaarutigineqartarput Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat nr. 40, 28. novembari 2019-imeersoq malillugu. Taamaammat nalilerneqarpoq taarsigassarsinissamut neriorsuutit siornatigut inatsisit atuuttut malillugit tunniunneqarsimasut atuukkunnaareersimassasut. Taamaattorli allanneqarneratigut isumannaarneqarpoq taarsigassarsinissamut neriorsuutit atuuttut tamarmik allannguutissatut siunnersuummi ilanngunneqartut.

**Ilanngussaq 1**

<b>Siunnersuut inatsisinut atuuttunut assersuullugu</b>	
<i>Oqaasertaliunneqartut atuuttut</i>	<i>Allannguutissatut siunnersuut</i>
	<b>§ 1</b> Inissianut tapiissuteqartarnermut taarsigassarsisarneq pillugu Inatsisartut inatsisaanni nr. 40, 28. november 2019-imeersumi makkuninnga allannguisoqarpoq:
<p><b>§ 28</b>, imm. 1, nr. 5. 5) Inissiami ineeqqanik inuussutissarsiutinut atugassamik ilusilersuisoqassaaq imaluunniit inissiamit inuussutissarsiummik ingerlatsisoqassaaq. Taamaattoq inuussutissarsiutit namminersorfiusut mikinerusut ilaatinneqanngillat.</p>	<p><b>1.</b> § 28, imm. 1, nr. 5, ima oqaasertalerneqassaaq: ” <b>§ 28.</b> 5) Inissiaq taarsigassarsisumut imaluunniit attartortumut taassumalu inoqutigiivinut najugaqarfissatut aamma aalajangersimasumik najugaqarfittut atornagu siunertanut allanut tamakkiisumik ilaannakortumilluunniit atornerqarpat. Taamaattoq inuussutissarsiutit mikinerusut namminersortut taarsigassarsisumit imaluunniit attartortumit taassumalu inoqutigiivinit ingerlanneqartut mininneqarput.”</p>
	<b>§ 2</b> Inatsisartut inatsisaat 1. januar 2025-mi atuutilissaaq. <i>Imm. 2.</i> Inatsisartut inatsisaanni taarsigassarsiat Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit Tapersiissutitalimmik inissialiortiternermut taarsigassarsititsisarneq pillugit siusinnerusukkut inatsisaasimasut naapertorlugit tunniunneqartut ilaatinneqarput.

	<p><i>Imm. 3.</i> Inatsisartut inatsisaani taarsigassarsinissanut neriorsuinerit ilaareersut tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit tapersiissutitalimmik inissialiortiternermut taarsigassarsititsisarneq pillugu siusinnerusukkut inatsisaasimasut naapertorlugit ulloq 1. januar 2025 sioqqullugu tunniunneqartut ilaatinneqarput.</p>
--	---



**Tusarniaanermut allakkiaq****Ilanngussaq 2**

1. Inissianut tapiissuteqartarnermut taarsigassarsisarneq pillugu inatsisip allannortinnissaanut siunnersuut tusarniaanermut nittartakkami qallunaatut: Høring af forslag til: Inatsisartutlov om ændring af Inatsisartutlov om boligstøttelån (Præcisering af anvendelse) aamma kalaallisut: Uunga siunnersuut: Tapersiissutitalimmik inissialiortiternernut taarsigassarsititsineq pillugu Inatsisartut inatsisaasa allannortinnissaa pillugu Inatsisartut inatsisaat (Atuisarnerup erseqqissaaffigineqarnera) tamanut saqqummiunneqarsimavoq nittartakkakut [www.naalackersuisut.gl](http://www.naalackersuisut.gl) 16.08.2024, tusarniaanermut akissuteqarnissamut kingusinnerpaamik 13.09.2024 nal. 12:00-mut piffissalerlugu.

Siunnersuut mail atorlugu 16.08.2024, ullormut 13.09.2024 piffissalerlugu ukununnga nassiunneqarsimavoq:

Nassiussanut allattuiffik:

Naalackersuisup Siulittaasuata Naalackersuisoqarfia ([govsec@nanoq.gl](mailto:govsec@nanoq.gl))

Aningaasaqarnermut Akileraartarnermullu Naalackersuisoqarfik ([oed@nanoq.gl](mailto:oed@nanoq.gl))

Innuussutissarsiutinut, Niuernermut, Aatsitassanut Naligiissitaanermullu

Naalackersuisoqarfik ([isiin@nanoq.gl](mailto:isiin@nanoq.gl) & [asn@nanoq.gl](mailto:asn@nanoq.gl))

Aalisarnermut Piniarnermullu Naalackersuisoqarfik ([apn@nanoq.gl](mailto:apn@nanoq.gl))

Isumaginninnermut, Ilaqutariinnut, Suliffeqarnermut Nunamullu Namminermut

Naalackersuisoqarfik ([isn@nanoq.gl](mailto:isn@nanoq.gl))

Ilinniartitaanermut, Kultureqarnermut, Timersornermut Ilageeqarnermullu

Naalackersuisoqarfik ([ikin@nanoq.gl](mailto:ikin@nanoq.gl))

Nunalerinnermut, Imminut Pilersornermut, Nukissiuuteqarnermut Avatangiisinullu

Naalackersuisoqarfik ([pan@nanoq.gl](mailto:pan@nanoq.gl))

Meeqqanut Inuusuttunullu Naalackersuisoqarfik ([jian@nanoq.gl](mailto:jian@nanoq.gl))

Peqqinnissamut Naalackersuisoqarfik ([pn@nanoq.gl](mailto:pn@nanoq.gl))

Kommune Kujalleq ([kommune@kujalleq.gl](mailto:kommune@kujalleq.gl))

Kommuneqarfik Sermersooq ([kommuneqarfik@sermersooq.gl](mailto:kommuneqarfik@sermersooq.gl))

Qeqqata Kommunian ([qeqqata@qeqqata.gl](mailto:qeqqata@qeqqata.gl))

Kommune Qeqertalik ([qeqertalik@qeqertalik.gl](mailto:qeqertalik@qeqertalik.gl))

Avannaata Kommunian ([avannaata@avannaata.gl](mailto:avannaata@avannaata.gl))

Kalaallit Nunaanni Naalagaaffiup Sinniisoqarfia ([ro@gl.stm.dk](mailto:ro@gl.stm.dk))

Ineqarnermut Naammagittaalliuuteqartarfik - Atuisoqarnermut Unammilleqatigiinnermullu

Aqutsisoqarfik ([aua@nanoq.gl](mailto:aua@nanoq.gl))

Nukissiorfiit ([kundeservice@nukissiorfiit.gl](mailto:kundeservice@nukissiorfiit.gl))

Nusuka ([nusuka2004@gmail.com](mailto:nusuka2004@gmail.com))

Kalaallit Nunaanni Sulisitsisut ([ga@ga.gl](mailto:ga@ga.gl))

Kalaallit Nunaanni Politiit ([grl-politi@politi.dk](mailto:grl-politi@politi.dk) og [grl-lesek@politi.dk](mailto:grl-lesek@politi.dk))

SIK ([sik@sik.gl](mailto:sik@sik.gl))

PK-mut siulittaasoq ([formanden@pk.gl](mailto:formanden@pk.gl))  
Mittarfeqarfiit ([mit@mit.gl](mailto:mit@mit.gl))  
Asiaq ([asiaq@asiaq.gl](mailto:asiaq@asiaq.gl))  
AK ([aknuuk@ak.gl](mailto:aknuuk@ak.gl))  
IMAK ([imak@imak.gl](mailto:imak@imak.gl))  
NPK ([info@npk.gl](mailto:info@npk.gl))  
ASG ([asg@asg.gl](mailto:asg@asg.gl))

2. Tusarniaanermut killigitap naanerani makkua siunnersuummut oqaaseqaatissaqaratik nalunaaruteqarput: Peqqissutsimut Naalackersuisoqarfik, Sulisitsisut, aamma Naalagaaffimmi politiit.

Tusarniaanermut killigitap naanerani SIK-miit, Inuussutissarsiornermut Naalackersuisoqarfimmiit aamma Nunatsinni Perorsaasut Kattuffianniit (NPK) oqaaseqaatit tiguneqarput.

Tusarniaanermut akissuteqaatit tiguneqartut tulliuuttuni sammineqarput. Naalackersuisut tusarniaanermut akissuteqaatinut ataasiakkaanut oqaaseqaataat uingasumik allanneqarput.

## SIK

SIK tapersiissutitalimmik inissialiortiternermut taarsigassarsititsisarneq pillugu Inatsisartut inatsisaata allangortinneqarnissaanut missingiummut makkuninnga oqaaseqaatissaqarpoq. § 28, imm. 1, nr. 5; Inuussutissarsiutit mikinerusut namminersortut, taarsigassarsisumit imaluunniit attartortumit taassumalu inoqutaanniit ingerlanneqartut, pineqartunut ilaatinneqanngillat.

SIK-p siunnersuutigaa inuussutissarsiutit mikinerusut namminersortut allat, toqqaannartumik sullitanik attaveqarfiunngitsut ilanngunneqarsinnaassasut.

Nunaqarfinni isorliunerusunilu amerlasuuni taarsigassarsisut isertitanut tunngaviusunut SIK-mut isumaqatigiissutit taamaallaat aallaavigisaraat, SIK-p ilisimalluarlugu, taakkua inatsit naapertorlugu tapersiissutitalimmik inissialiortiternissamut taarsigassarsisinnaanissamut suli periarfissaqassapput.

Kiisalu illut tapersiissutitalimmik inissialiaasimasut iluarsanneqarnerannut atatillugu taarsigassarsinissamik periarfissaqarneq, nunaqarfinni isorliunerusunilu atuutissaaq.

Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaata ulloq 1. januar 2025 atuutilersumik allangortinneqarnissaa pillugu tusarniaanermut nassuiaatitaanullu SIK tapersiivoq.

*Akissut*

*Inissiamit tapersiissutitalimmik inissialiortiternermut taarsigassarsititsiviusimasumit inuussutissarsiutinik mikinerusunik namminersortunik ingerlatsinissamut periarfissaqarneq, inissiap najugaqarfissatut atorineqartussaana pillugu maleruagassamit pingaarnemit ilaatitsinninneruvoq. Aalajangersagaq killilersuisumik paasineqassaaq. Nammineq ulluunerani paaqqinnittartutut aamma isikkanut passussivimmi sullitanik attaveqarnissaq aalajangersimasoq nassuiaatini ammaanearpoq. Siunnersuummi allanngortitsisoqannigilaq.*

*Allannguutissatut siunnersuutip kingunerisaanik tapersiissutitalimmik inissialiortiternermut taarsigassarsititsisarneq pillugu Inatsisartut inatsisaanni aammalu piginnittut nikinnissaannut, tapersiissutitalimmik inissialiortiternermut taarsigassarsianik allanngortitsinissamut isumakkeerinissamullu periarfissaqarnermi, allatigut allanngortitsisoqannigilaq. Illunik tapersiissutitalimmik illuliarineqarsimasunik iluarsaassinissamut, pitsannngorsaanissamut allilerinissamullu taarsigassarsititsisarneq tapiissuteqartarnerlu, inissianut aningaasalersuineq pillugu Inatsisartut inatsisaanni maleruagassiivigineqarpoq.*

### **Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfik**

Maleruagassiinermik inissiap taarsigassarsisumit imaluunniit attartortumit taassumalu inoqutaannit najugaqarfissap saniatigut siunertanut allanut atoqqusaanninneranik siunertaqartumik, siunnersuut § 1, nr. 1-imi imaqarpoq. Kisianni taamaattoq inuussutissarsiutit mikinerusut namminersortut, taarsigassarsisumit imaluunniit attartortumit, imaluunniit taakkua inoqutaannit ingerlanneqartut, ilaatinneqannigillat.

Nassuiaatini allassimavoq, maleruagassat atuuttut naapertorlugit inissiat Inatsisartut inatsisaat naapertorlugu taarsigassarsititsivigineqarsimasut inuussutissarsiornermut atorineqassanngitsut, inuussutissarsiutit mikinerusut namminersortut tassani ilaanatik. Inissiaq pisortanit taarsigassarsititsivigineqarsimasoq inuussutissarsiornermut atorineqarpat, taarsigassarsiat akilersinneqartussanngorlutik akilerneqartussanngussapput.

Aalajangersakkanut ataasiakkaanut nassuiaatini arlaleriarluni immikkoortoq manna allassimavoq:

*”Inissiamik pilersuinerup saniatigut inissiap, soorlu unnuiffiullunilu ullaakkorsiortarfittut (bed and breakfast), airbnb-itut, gæstehjemmitut, tikeraartunut ineeqqatut, vandrehjemmitut, airbnb-itut, akunnittarfittut allatulluunniit, siunertanut allanut atorineqarnera, najugaqarfittut atorineqarneratut isigineqassanngilaq. Assinganik assersuutigalugu ineeqqamik suliffeqarfiup sulisut, tikeraartut imaluunniit angalasut inissaqartinnissaannut*

*attartortinneqarnera inissiatut atorineqartussatut ilaasussaangilaq. Taamatut atuneq inuussutissarsiutigalugu suliffeqarfittut ingerlatsinertut isikkoqarpoq, inuussutissarsiutitullu mikinerusutut isigineqarnani.”*

Maleruagassat atuuttut naapertorlugit taarsigassarsiarititat akilerneqartussanngorlutik akiligassanngussapput: ”...*inissiami ininik inuussutissarsiorfissanik aaqqissuussisoqarpat imaluunniit inissiamiit inuussutissarsiummik ingerlatsisoqarpat. Taamaattoq inuussutissarsiutit mikinerusut namminersortut ilaatinneqanngillat.*” Nalinginnaasumik oqaatsinik paasinnittarnejq malillugu tamanna imaappoq, inissiap pingaarnertut najugaqarfissatut siunertaqarnera allanngortinneqarpat. Inissiaq pingaarnertut najugaqarfissatut atorineqaannartussaattillugu taamaattoqarsimanissaa takujuminaappoq, aamma inissiaq imaluunniit taassuma ilaata inissiamit piginnittup saniatigut allaniit atorineqaraluarpalluunniit.

Siunnersuummi aamma taarsigassarsititsinermut isumaqatigiissutit atuutereersut pineqartunut ilaatinneqarnissaat, takuuk siunnersuummi § 2, kingumut atuutilersumik inatsisiliornerusussaavoq. Isumaqatigiissummi illuatungeriit nalinginnaasumik isumaqatigiissutit tunngavigisinnaasussaavaat, tamannalu tamatuma kingorna atugassarititaasunik annertunerusunik atuutsitsilertoqarsinnaanissaanut akerliuvoq.

Air bnb inuussutissarsiornermi ingerlatamut aalajangersimasumut taaguutaanngilaq. Taanna tassaavoq nittartagaq ineeqqanik, illuaqqanik, illunik, inissianik il.il. attartortitsinermut atorineqartoq. Nittartagaq aamma nammineerluni sulinnigiffeqartilluni nammineq inigisap attartortinnissaanut, imaluunniit ilaannikkut inissiami nammineq najugaqarfisami ineeqqamik ataatsimik attartortitsisarnermut, atorineqarsinnaavoq. Arlallit taamaaliortartut aamma piffissani nammineerlutik inigisaminniinnermini taamaaliortarput.

Inatsisip oqaasertaanni aamma ”attartortoq” eqqaaneqarmat, inissiaq aamma – arlaannik annertussusilimmik – attartortinneqarsinnaasooq, tamanna tikkuussivoq. Tamanna siunnersuutigineqartoq tunngavigalugu, suut inatsisit malillugit attartortitsinertut isigineqarnissaanut killissaliussat suunersut ersarinngitsumik allassimavoq.

*Akissut:*

*Maleruagassat atuuttut naapertorlugit inissiaq tapersiissutitalimmik inissialiornissamut taarsigassarsititsivigineqarsimasooq inuussutissarsiornermut atorineqarsinnaanngilaq, inuussutissarsiutit mikinerusut namminersortut tassani ilaanatik. Inissiaq tapersiissutitalimmik inissialiornissamut taarsigassarsititsivigineqarsimasooq inuussutissarsiornermut atorineqarpat, taarsigassarsiarititat akilerneqartussanngorlutik akiligassanngussapput.*

§ 28, imm. 1, nr. 5-imut siunnersuummi erseqqissarneqarpoq, inissiaq tapersiissutitalimmik inissialiornissamut taarsigassarsititsivigineqarsimasoq taamaallaat najugaqarfissatut aammalu piginnittup taassumalu inoqutaasa imaluunniit attartortup taassumalu inoqutaasa aalajangersimasumik najugaqarfiattut atorneqarsinnaasoq.

§ 28, imm. 1, nr. 5-imut siunnersuummi erseqqissarneqarpoq, inissiaq tapersiissutitalimmik inissialiornissamut taarsigassarsititsivigineqarsimasoq najugaqarfissatut aamma piginnittup taassumalu inoqutaasa aamma attartortup taassumalu inoqutaasa aalajangersimasumik najugaqarfiattut taamaallaat atorneqarsinnaasoq. Tamatuma kingunerisaanik piginnittup imaluunniit attartortup inissiaq taamaallaat najugaqarfissatut atorsinnaavaat, peqatigisaanillu inissiami aalajangersimasumik najugaqarlutik inuit nalunaarsorsimaffianni nalunaarsorsimasussaalluni.

Allannguutissatut siunnersuutigineqartoq ulloq 1. januar 2025 atuutilersumik atuutilissaaq. Siunnersuummi ilaatinneqassapput taarsigassarsititsinissamut neriorsuutit aamma tapersiissutitalimmik inissialiornissamut taarsigassarsiarititat pioreersut. Naliliisoqarpoq erseqqissaaneq aammalu maleruagassanik atuuttunik sukaterineq aammalu inissiaq tapersiissutitalimmik inissialiornissamut taarsigassarsititsivigineqarsimasumi taarsigassarsiarititat pingaarnerpaatigut Kalaallit Nunaanni inissiamik pilersuinermi ilaatinneqarnissaannik atorneqarnissaanillu qulakkeeriniarneq, tassani pineqartoq. Naliliisoqarpoq allannguutit taarsiisusnaanani maleruagassiinissamut inatsisiliornermut pissaaneqartut nalinginnaasumik periarfissaqarnerisa iluanni pisinnaasut.

### **Nunatsinni Perorsaasut Kattuffiat (NPK)**

§ 28, imm. 1 nr. 5 najugaqarfissatut atorneqarnissaa pillugu siunnersuut, inissiaq tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat naapertorlugu taarsigassarsititsivigineqarsimasoq, taamaallaat piginnittup taassumalu inoqutaasa imaluunniit attartortup najugaqarfissaatut atorneqarsinnaasoq, erseqqissaanermik imaqartoq NPK-ip isumaqatigaa.

*Akissut:*

*NPK-ip siunnersuummut tapersiinera allanneqarpoq.*